

ARRAUNA

Erreka faborito Euskal Herriko Txapelketan


Itsasoaren egoerak zerikusi handia izan dezake Donostiako estropadetan

Pasai Donibanekeo trainerua da urrezko domina eskuratzeko faborito nagusia, gaur Donostian jokatu den Euskal Herriko Txapelketan. Gipuzkoako Txapelketan gertatu zen bezala, itsasoaren egoerak zerikusi handia izan dezake. San Pedrok eta Oriok indarrean daudela erakutsi behar diete Sanjuandarrei.

RAMON BASALDUA / DONOSTIA

Hamabi ontzi izango dira gaur Donostiako estropada eremuan, Euskal Herriko Txapelketaren lehen ihardunaldian parte hartzeko. Gipuzkoako Txapelketan lehen lau postuetan sailkatu ziren ontziak dira faboritoak, Bizkaia eta Gipuzkoako seina trainerurik onenak biltzen dituen txapelketa honetan. Bizkaitarrek ez dute zereginik San Juan, Orio, San Pedro eta Arraun Lagunakeko traineruen aurrean. Dena den, Zierbenak ustekaberen bat emateko gai dela frogatu zuen Bizkaiko Diputazioak antolatutako banderan.

Txanden zozketan gertatutakoaren arabera, Pako Prietok entrenatzen duen Pasai Donibanekeo Erreka ontzia, eta Julian Osaren San Pedroko Libia, elkarrekin arituko dira hirugarren txandan, Santurtzi eta Ur Kirolakekin batera. Pasaiako ontziek nahiko izango dute hurrengo eguneko finalerako sailkatzearekin, izan ere bertan erabakiko bait da Euskal Herriko txapelkun berria. Iaz Sanjuandarrek txapelkun izan ziren



Pasaitarren arteko lehia iragarrita dago aurreneko postua eskuratzeko, Erreka eta Libia igartzen bait dira bi traineru indartsuenak.

Lau traineru baino ez dira ageri Euskal Herriko Txapelketa irabazteko aukeran, eta laurak gipuzkoarrak dira.

arren, Sanpedrotarrek lortu zuten garaipena aurreko lau edizioetan.

Bizkaitarrek aspalditik dakite, ez dutela dominarik lortuko. Hori dela eta, euren helburu nagusia Nerbioi-BBK Banderan parte hartzeko txartela eskuratzea da. Estropada hone-

Txandak

Aurrenekoa:

Orio
Arkote-Bermeo
Zarautz
Zierbena

Bigarrena:

Lutxana
Algorta
Arraun Lagunak
Kaiku

Hirugarrena:

San Juan
San Pedro
Santurtzi
Ur Kirolak

Gipuzkoako Txapelketan bezala, Kontxako estropada eremuan itsasoa erabakiorra izan daiteke.

tako antolatzaileek esan dutenez, Euskal Herriko Txapelketan hiru posturik onenak lortzen dituzten traineru bizkaitarrak izango dira Nerbioi-BBK Banderan arituko direnak. Taldeetako arduradunak ez daude konforme hala ere, eta bost

talde sailkatzea eskatu dute. Lutxana, Algorta, Arraun Lagunak eta Kaiku izango dira bigarren txandan arituko diren ontziak. Arraun faboritoa den arren, lan gogorra egin beharko du Bizkaitarra eta Algorta atzean uzteko. Hirugarren txandari dagokionez, hauexek dira parte hartuko duten ontziak: Orio, Arkote-Bermeo, Zarautz eta Zierbena. Ikusi egin beharko galipoak zer egiteko gai diren, eta nola amaitzen den Zarautz eta Arkote-Bermeoren arteko lehia. Gogoratu, gaurko lau denborarik onenak biharko finalean izango direla eta hurrengo laurak, kontsolazio txandan. Gainontzeko laurak ordea, txapelketatik at geratuko dira.


Ardanza: «Zortzi onenen artean sartzea dugu helburu Algortan»

R.B. / DONOSTIA

Andres Sanchezek entrenatzen duen Algortako Opel Karezalde ontziak sekulako estropada egin zuen Bizkaiko Txapelketan. Algotakoek brontzeko domina lortzeaz gain, Kontxarako sailkatze estropadan parte hartzeko aukera eskuratu dute. «Oso garrantzitsua izan da guretzat Bizkaiko Txapelketan egin dugun lan bikaina. Ordura arte nahiko zorte txarra izan dugu, estropadetako balizak zozketatzerakoan. Niretzat ez da ustekabea izan. Algortan goi mailako koadrila batu dugu eta gure unerik onena, Bizkaiko Txapelketatik gora etorriko da. Gure helburua, Euskal Herriko Txapelketan, iragan asteburuan Santurtzin erakutsitako maila agertzea da. Hori lortzen badugu, zortzi onenen artean sartuko gara zalantzarik gabe», adierazi zion EGUNKARIAri Anselmo Ardanazak, Algorta taldeko idazkariak.

Andres Sanchezek mutilek ez dute lan erraza izango zortzi onen artean sartzeko, Euskal Herriko traineru onenek hartuko bait dute parte estropadetan, Gipuzkoa eta Bizkaia

Txapelketetan txartela lortu zuten hamabiek. Orio, San Juan, San Pedro, eta Arraun Lagunak alde batera utzi eta Zierbena, Zarautz, Kaiku, Santurtzi eta Arkote-Bermeo izango dira bere arerio nagusienak. Algotak estropada onak eta txarrak egin ditu. Ikusi egin beharko asteburu honetan zer gertatzen den.



Santos: «Osteguneko emaitzak ez ziren normalak izan, itsasoagatik»

RAMON BASALDUA / BILBO

Aurten Pasai San Pedroko Libia ontziak ezin izan du azken lau urteotan lortu izan zuen Gipuzkoako Txapelketa eskuratu, Pasai Donibanekeo Erreka nagusi izan bait zen ostegunean, Kontxako estropada eremu berrian jokatuak txapelketan.

Dena den, Pasai San Pedroko delegatua den Jose Manuel Santosek ez dio garrantzi handiegirik eman estropada honi. «Ostegunean jokatuak estropada ez zen ohikoa izan. San Juan eta gu batera sartu ginen hirugarren zibogara eta azken luzean 41 segunduko aldea atera ziguten. Bestalde, Orio ere gure atzetik zetorren arren, gu baino hamabi segundu gutxiago behar izan zituen estropada burutzeko. Nire ustez, San Juan eta San Pedoren artean parekotasun handia dago eta zertxobait atzerago daude Orio eta Arraun Lagunak. Asteburuan jokatu den Euskal Herriko Txapelketa guztiz desberdina izango da, itsasoa hobeto badago bederen. Iaz geu izan ginen Gipuzkoako txapelkun eta San Juanek eskuratu zituen Euskal Herriko Txapelketa eta Kontxako estropada. Ea bada aurten, euren Gipuzkoako Txapelketa eskuratu dutenez, Euskal Herrikoa eta Kontxa guretzat diren», esan zigun San Pedroko delegatuak. Ez dago gehiago eskatzerik, eta erronkaren zailtasuna ezagutu arren, saiatu gabe behintzat ez dira geratuko.



Orio, Arraun Lagunak eta Zierbena izango dira pasaitarren etsai nagusiak.

CARLOS VILLAGRAN